

22 OCT 2001

PESARA KERAJAAN TURUT NIKMATI PELARASAN 10 PERATUS

KUALA LUMPUR, 22 Okt (Bernama) -- Pesara kerajaan akan turut menikmati pelarasan pencen pada kadar 10 peratus mulai 1 Januari 2002.

Presiden Cuepacs Datuk N. Siva Subramaniam berkata perkara ini disahkan oleh Jabatan Pencen hari ini.

"Sebagai contoh jika pencen bulanannya RM500, pesara itu mendapat kenaikan RM50," katanya kepada Bernama di sini.

Siva Subramaniam berkata pelarasan ini adalah selaras dengan kenaikan gaji 10 peratus untuk kakitangan awam yang diumumkan oleh Perdana Menteri Datuk Seri Dr Mahathir Mohamad dalam Belanjawan 2002 pada Jumaat lepas.

Katanya pelarasan untuk pesara akan melibatkan perbelanjaan kerajaan sebanyak kira-kira RM500 juta setahun.

Beliau berkata seramai 440,000 pesara dijangka mendapat faedah melalui pelarasan ini.

"Pelarasan ini merupakan satu eksersais melibatkan pesara yang cukup besar. Ia tentunya dapat mengurangkan beban kewangan pesara," katanya.

Pesara kerajaan turut menikmati pelarasan 10 peratus seperti kakitangan awam yang sedang berkhidmat ketika pelarasan terakhir pada 1999.

-- BERNAMA

RV AFY LAT